

411126 650 n. 43
BAPTISMUS IGNIS,

SIVE

DE S. SPIRITUS
ADVENTU
ORATIO

Habita in Sacello Pontificio

AD SANCTISSIMUM DOMINUM NOSTRUM

CLEMENTEM XI.
PONTIFICEM MAXIMUM.

A FRANCISCO PHILIPPO INZAGHI

Seminarii Romani Convictore.



ROMÆ, MDCCIV. Excudebat Cajetanus Zenobius, SS. Domini Nostri
CLEMENTIS XI Typographus, & Scalptor.

SUPERIORUM FACULTATE.



CLEMENTI XI.
PONT. MAX.

FRANCISCUS PHILIPPUS INZAGHI
FELICITATEM.



BAPTISMUM IGNIS ut Tuo
Nomini inscriberem, BEA-
TISSIME PATER, *præter alias causas adbor-*
tatus me est Baptismus Aquæ, quem tantâ
A po-

populi totiùs celebritate ; tam spectabili Pietatis Tuæ exemplo propriâ Ipse manu Judæe familiæ nuperrimè contulisti. Enimverò viderat Te Roma confertissimo populo Divinas Epulas laboriosissimè impertientem ; viderat confitentium peccata singulari patientiâ sæpius excipientem ; viderat Sinensem Legatum Pontificiâ consecratione inaugurantem ; viderat sacro oleo ad supremam fortiter ineundam pugnam confoventem egrotos ; viderat Cælestes Fratris Tui Filiæ nuptias cum specioso præ filiis hominum , nobilissimoque omnium sponso conciliantem. Jam verò ut nullum ferè superesset , quod per Te publicè non ministrasses Sacramentum ; ipsa etiam Baptismi , & Confirmationis Divina mysteria obire religiosissimè voluisti. O spectacula , quæ Urbem Fidei Regiam incredibilem in modum cobonestant , & ornant ! O dignas Sacrorum Principe occupationes , qui non modo mente , & imperio , sed manu etiam , & operâ Religionis commodis , & incrementis totus allaboret ! Hæc nimirum una est ratio sanctissimarum rerum venerationem , & pretium in mortalium

talium animis amplificandi; cum enim tanta sit illarum præstantia, sive ab Auctoris claritudine, sive ab copiâ utilitatum, ut augeri nulla modo queat: commendari solum nobis magis possunt ab ministrantium amplitudine, atque dignitate. Quid quod tam multa humanitatis in eandem familiam, munificentiae, amoris argumenta edidisti, ut nulla verior unquam, & expressior visa imago sit aut Pastoris Euangelici, qui inventam ovem in humeros suos imponit, & coactis amicis, & vicinis, congratulamini, ait, mihi, quia inveni ovem, quæ perierat: aut benevolentissimi Parentis, qui accurrens cecidit super collum ad saniora consilia redeuntis Adolescentis, & osculatus eum, adducite, inquit, vitulum saginatum, & occidite, & manducemus, & epulemur. Perge, BEATISSIME PATER, tam prolixæ voluntatis significationibus errantes oves ad Christi pascua pellicere: perge saluberrimis edictis planiorem humanæ imbecillitati ad veram amplexandam fidem viam sternere: ego enim ex tam incenso alienæ salutis studio, & effusissimâ, quâ populos omnes com-

*plecteris , cbaritate , futurum facile conjicio ,
 ut , Te potissimum imperante , Divi-
 num illud impleatur Oraculum ,
 Fiet unum Ovile , & unus
 Pastor .*



ORATIO.



BAPTISMUM Ignis, quem Joannes illis olim verbis præcinuerat, *Ipse vos baptizabit Spiritu Sancto, & Igni*, hodierna tandem die Discipulis suis imperitum à Christo videmus, BEA-

TISSIME PATER. Et sanè comparatum sapienter fuit, ut sicut imperfectior Joannis in Aquâ Baptismus via quædam fuerat, & præparatio ad Baptismum in Aquâ, & Spiritu; ità Ignis Baptismum uterque illorum præverteret. Etenim per lavacrum regenerationis, & renovationis Spiritus Sancti, quem effudit in nos abundè Deus per Jesum Christum Salvatorem nostrum, quasi modo geniti infantes solùm
ini-

initiamur Deo , & ad Christianam militiam
 tamquam Tirones primùm omnes adscribi-
 mur . Per Baptismum verò Ignis adulti , &
 jam Veterani , iique potissimùm , qui aliorum
 instituti Imperatores sunt , ac Duces , induun-
 tur virtute ex alto , ut portent nomen Domini
 coram Gentibus , & Regibus . Per illud vete-
 rum culparum maculis elutis , cum inimici
 essemus , reconciliati sumus Deo ; per hunc
 jam amici , omni humanarum cupiditatum ,
 & lutearum affectionum abstersâ rubigine ,
 tamquam aurum probamur in fornace , ut
 similes fiamus Cœlestis illius Hierusalem , de
 qua scriptum est , Ipsa verò Civitas aurum
 mundum . Transeundum nimirum nobis est
 per Ignem , & Aquam , ut sic educamur in re-
 frigerium . Proinde si beatissimo hoc Igne non
 expiamur , dum vivimus ; post mortem purga-
 tricibus erimus flaminis , ut sic dixerim , ba-
 ptizandi . Si enim non intrabit in eam ali-
 quod coinquinatum , exuendæ certè nobis
 antea sunt sordes illæ , quas terrena contagiò
 perpetuo nobis aspergit . Nihil verò ad labes
 expurgandas præsentius inveniatur , quàm
 ignis , qui non extimam modo rerum faciem

ab-

abluit, sed penitissimos etiam sinus vi sua pervadens, omne quantumvis altissimè insidens vitium excoquit, conficit, consumit. Sit igitur Baptismus Aquæ via nobis, & janua ad militantem in terris Ecclesiam Dei: Baptismus certè Ignis janua ad triumphantem in Cœlo non immeritò videatur: alter incipientium, eorum scilicet, qui Christianæ vitæ adhuc ponunt rudimenta: perfectorum alter, eorum nempe, qui præmia jam expectant, ac triumphos.

Hoc præterea inter Aquæ Baptismum, & Ignis interesse discriminis dixerim, quod ille plus ad veteres abolendas maculas proficiat, quam ad prohibendas novas: Hic ipsas etiam nequiorum cupiditatum radices, ac fibras persequens, & elidens (Deus enim noster ignis consumens est) futuræ deinceps innocentiae cum primis prospiciat. Ad hæc accipientes armaturam Dei, & induti lorica[m] Justitiæ, in hujus Ignis fornace temperatas, atque excoctas, non adversus modò carnem, & sanguinem, sed adversus Principes, & Potestates, tam alacres pugnamus, & intrepidi, ut provocare etiam, & laceßere ad certamen
cum

cum Apostolo minimè vereamur. Quis nos separabit à charitate Christi? Certus sum, quia neque mors, neque vita, neque Angeli, neque Principatus, neque Virtutes, neque Creatura alia poterit nos separare à charitate Dei. O admirabilem igitur Baptismatis hujus præstantiam, & efficacitatem, quod & veteres maculas expiat, & repellit novas.

Quidni igitur etiam nos felicissima hæc incendia lacrimis, precibus, suspiriis evocantes è Cælo exclamemus, Baptismo habeo baptizari, & quomodo coarctor usquedum perficiatur? Apposuit verè Deus nobis Ignem, & Aquam: ad utrumque porrigamus manus nostras; quando altissimo consilio factum est, ut quæ fuerant atrocissima olim Divinæ ultionis arma, potissima jam sint nostræ pacificationis instrumenta. Et quoniam lustralibus jam Aquis Divino omnes beneficio sumus abluti, illo etiam baptizari Igne naviter studeamus, de quo dici certè potest, Salvus erit sic quasi per Ignem.



F I N I S.

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

